

E whakamārama ana tēnei pukameka i ngā tautoko ka taea e koe, ā, me te hunga hei tonu āwhina māu mēnā ka pākia koe e tētahi kōhurutanga.

Ko te mate o tētahi tangata tino tata ki a koe he āhuatanga tino ngaukino. Ka āwhina ngā tautoko i a koutou ko tō whānau ki te whakarite i te pānga o te taihara. He mea nui ki te kimi i te tautoko tika māu. He pokapū kei tō rohe e whakarato tautoko kare ā-roto me te whaitake, he mea ngaio. Waea atu ki te Victims Information Line ki 0800 650 654 ki te rapu mōhio mō ngā tari tūtata ki a koe.

Tirohia te pito o tēnei pukameka mō ngā whakapā matua me tētahi rārangi kupu.

Ngā motika a te hunga pāpurenga

E whai tika ana koe kia whakamōhiohia koe mō ngā ratonga āwhina i a koe, kia whakamōhiohia haerehia koe mō te kēhi i roto i te kōti me te mōhio anō ki ngā mea ka pā mai ina haere koe ki te kōti.

E whai tika ana koe ki te kōrero atu ki te kōti mō te pānga mai o te taihara ki a koe. Mēnā ko koe te pāpurenga o tētahi taihara nā te tamaiti, taiohi rānei, e whai tika ana koe ki te haere ki tētahi hui rōpū ā-whānau me te tuku kōrero anō mō ngā mea e hiahia ana koe kia puta.

I ētahi kēhi, e whai tika ana koe, tō māngai rānei ki te kōrero mō ngā mea pēnei i te pēhanga ingoa, te peira, whakarautanga kāinga, te tukuhere rānei.

Ko te tikanga ka hūmārika, ka aroha, ka whakautu hoki ngā āpiha kōti, ngā pirihimana me ētahi atu i roto i te kēhi ki a koe. E whai tika ana koe ki te tūmataiti.

Pānuihia te Victims Code mō ētahi atu kōrero mō ō motika me ngā whakaritenga e tūmanako ana māu. Kei runga tēnei i tā mātau paetukutuku victimsinfo.govt.nz me ētahi atu kōrero whaitake.

Mēnā ki ō whakaaro kāore anō kia tutuki ō motika, kāore rānei i pai ngā ratonga ki tāu i tūmanako ai, ka taea e koe te tuku amuamu. Tirohia a victimsinfo.govt.nz, waea atu rānei ki te Victims Information Line i 0800 650 654.

Te whakatewhatewhanga

He tino uua tētahi whakatewhatewhanga kōhuru mō te whānau me ngā hoa o te pāpurenga. Mēnā he pāpurenga tētahi o tō whānau nā te kōhurutanga, he mea nui te tiki i ngā tautoko tika.

Ka tohua e ngā pirihimana tētahi pirihimana takawaenga ki tō whānau. Ka whakarite tēnei pirihimana takawaenga kia noho mōhio koe ki ngā mea i roto i te whakatewhatewhanga me te kōti. Ka taea anō e ia te whakautu i ō pātai katoa me te tūhono atu i a koe ki ngā tari tautoko motuhake.

Ahako he tino uua mō te whānau, tērā pea ka noho te tangata hemo ki te wāhi kei reira ia kia kohia rā anō ngā taunakitanga. Ka tirohia anō e tētahi tākuta tauwhāiti, he kairangahau mate. Ko te kaupapa o tēnei he whakaemi i ngā taunakitanga hira mō te kēhi kōti.

Ko te tikanga he roa te wā o tētahi whakatewhatewhanga kōhuru. Me mātua whakaatu ngā pirihimana i aha, nā wai i mahi, ā, he aha tō rātau whāinga. Ka whakamōhiohia haerehia tō whānau e te pirihimana takawaenga me te āwhina i a koe ki te whakariterite i te tangihanga, me ētahi atu whakaritenga.

I te wā o te whakatewhatewhanga, ka uiuihia pea e ngā pirihimana ētahi mema o tō whānau, me ētahi atu tāngata, me te kohi taunakitanga pēnei i ngā whakaahua me ngā whakamātautau e pā ana ki te whare whakawā. Mēnā he nui ngā taunakitanga a ngā pirihimana, ka hopukina ā-ture te tangata me te whakapā hē i a ia ki tētahi taihara.

UTU HERE

Ina hopukina tētahi, tērā pea ka tukuna ia kia tae rawa ki te wā e tū ai ki te kōti. E kīia tēnei he utu here (bail). I ētahi wā kei reira ngā here mō te wāhi noho o te tangata me te rāhui haere pō. Mēnā ka whakaaro ngā pirihimana kei te tūpono mōrearea koe, ētahi atu rānei i te hāpori ka mau herehia te tangata tae rā anō ki te haerenga ki te kōti, i reira ka taea e ia te tonu utu here anō.

Ka tukuna ki a koe te whai wāhi ki te whakapuaki i ōu whakaaro mō te tukunga o te tangata kua tukuna ā-utu here. Kei a koe te tikanga ki te whakauru atu ki te rēhita whakamōhio pāpurenga kia noho mōhio haere koe mō ngā pānga ki te tangata hara i muri i te whakawhiu.

Ka noho matatapu ō kōrero āmiki. Mēnā e hiahia ana koe, ka taea te kōwhiri i tētahi tangata ki te whiwhi i ēnei kōrero mōu.

TE TAUĀKĪ PĀNGA PĀRURENGA

Ka pātaihia koe mēnā e hiahia ana koe ki te tuku i tētahi tauākī pānga pāpurenga. Ka whakamārama atu tēnei ki te kōti i te pānga o te taihara ki a koe, ki tō whānau hoki. Ka taea e tō pirihihana takawaenga, Manaaki Tangata, tētahi atu tari āwhina rānei te āwhina i a koe ki te tuhi i tēnei tauākī. Tirohia he kōrero atu anō mō tō tauākī pānga pāpurenga i raro i *Te whakataunga me te whiu*.

Tautoko

E wātea ana ngā ratonga tautoko whānui hei āwhina i a koe.

VICTIM SUPPORT HOMICIDE SUPPORT SERVICE

He ratonga tauwhāiti tēnei hei āwhina i a koutou ko tō whānau i roto i ngā wāhanga katoa o te hātepe, ā, me muri anō i te mutunga o te kēhi. Ka whakarite tēnei ka whiwhi koe i ngā tautoko ā-ngākau e hiahiatia ana koe ka mutu me ngā tautoko whaitake e āhei ana koe. Ka tūhonoa atu koe e ngā pirihihana ki tēnei ratonga, ka taea rānei e koe te whakapā atu ki Manaaki Tangata i 0800 842 846.

NGĀ TAUTOKO TOHUTOHU MĀTANGA

Ko ngā whānau me ngā hoa o ngā pāpurenga kōhuru, ngā kaiwhakaatu me ngā tāngata i tae tuatahi atu ki te kōhurutanga ka whiwhi i ngā huinga tohutohu tae atu ki te 30. Me whakapā atu ki a Manaaki Tangata kia mōhio ai koe mēnā ka taea e koe tēnei tohutohu, ā, me pēhea te tono.

TE TAIHARA TAIOHI

Mēnā nā tētahi taiohi i raro i te 17 tau te taihara, ka whakaritea te take mā te hātepe ture taiohi. He mea nui ngā pāpurenga i roto i te hātepe ture taiohi, ā, e whai tika ana koe ki te haere ki tētahi hui rōpū ā-whānau.

E wātea ana ngā rauemi whānui i Te Tari Āwhina i te Tamaiti, te Rangatahi, tae atu ki te Whānau (CYF) me ngā kōti mō te pūnaha ture taiohi. Ka whakapā atu tētahi kairuruku rōpū ā-whānau mai i CYF ki a koe.

TE TAUTOKO Ā-PŪTEA

E wātea ana ngā pūtea hei āwhina i a koe ki te utu i ētahi o ngā utu e pā ana ki te taihara. Mō te tiroiro mēnā ka whiwhi pūtea koe, ā, me pēhea te tono, whakapā atu ki 0800 842 846.

- Atu ki te \$5000 e wātea ana ki te whakaiti i ngā pānga o te kōhuru ki te whānau ake. Ka āwhina ki te whakakapi i te kore moni whiwhi me ngā whakapaunga whānui.
- He \$124 i te rā (\$64 mō te hāwhe rā) e wātea ana ki ia tangata atu ki ngā mema pakeke e rima o te whānau mō te haere ki ngā whakawātanga Kōti Teitei.
- E wātea ana ngā pūtea tautoko mō te haerenga atu, te wāhi noho me ngā utu hāngai mā ngā tāngata atu ki te ono hei haere ki te kōti me ngā whakawātanga Poari Tukuhere.
- Atu ki te \$10,000 hei āwhina i ngā utu o te tangihanga. Whakapā atu ki a ACC ki te tono mō tēnei takuhe.

Ka āhei anō pea koe ki ētahi atu āwhina ā-pūtea mai i ACC. Pātai atu ki tō pokapū tautoko ki te rapu mōhio atu anō, waea atu rānei ki te ACC Claims Helpline i 0800 101 996.

I te kōti

Ko te tikanga he maha ngā tūnga a te whakapaenga (te tangata whakatuaki taihara) ki te kōti, hei tauira, ki te whakapuaki he hara tōna, kore hara rānei, mō te titiro rānei a te kaiwhakawā i ngā taunakitanga. Ko te tikanga kāore koe e herea ki te haere ki ēnei whakawātanga, engari ka taea e koe te haere mēnā e hiahia ana koe ki te haere.

Ki te whakapuaki te whakapaenga kāore ia i te hara, ka whakatakotohia e te kaiwhiu te kēhi ki te kaiwhakawā me te rōpū whakawā. Ka mahi te kaiwhiu mā te kāwanatanga, ā, kei a ia te kawenga mō te hāmene kēhi mō te Karauna, ngā pirihihana me te iwi whānui. Tērā pea ka hiahiatia kia tū koe hei kaiwhakaatu mō te Karauna hei āwhina ki te hāpono i te kēhi ki te whakapaenga (tirohia *Te noho hei kaiwhakaatu*).

Ka tūtaki te kaiwhiu ki a koutou ko tō whānau me te kōrero atu he aha ngā whakapae ka whakatakotohia me te take, ā, he aha ka puta i te kōti. Nā runga i te āhuatanga o te kēhi, he kōhuru pea te whakapā hē, he matenga pokorehū rānei. Ka whakamārama te kaiwhiu i tēnei ki a koe.

Ka tuku whakataua pea te kōti e ārai ana i te tangata mai i te whakaputa i te ingoa o te pāpurenga, ōna taipitopito e mōhiotia ai ko wai ia. Ka whakamārama te kaiwhiu i tēnei hātepe ki a koe.

Me kōrero atu koe ki tō kaitohutohu pārurenga kōti, te pirihihana takawaenga, tō kaimahi tautoko rānei mēnā e hiahia ana koe i ngā āwhina rongo, nekeneke, whakamāori reo rānei i roto i te kōti.

He mea nui tō haumaruru. Mēnā he āwangawanga ōu ahakoa te wā mō tō haumaruru i te kōti, me kōrero atu ki tētahi pirihihana, āpiha whakamaruru rānei.

Tērā pea ka aro mai te hunga pāpāho ki te kēhi me te tono kōrero mai i tō whānau. Ka taea e tō pirihihana takawaenga te tuku tohutohu ki a koe mō te whakariterite i te hunga pāpāho.

KAITOHUTOHU PĀRURENGA KŌTI

Ina tū tuatahi te whakapaenga ki te kōti, ka whakapā atu tētahi kaitohutohu pārurenga kōti ki a koe. Nāna ake te mahi ki te whakamōhio haere i a koe mō te āhua o tō kēhi, ā, me te wāhi anō ki a koe. Ka taea ano e ia te kōrero atu ki a koe me haere koe ki hea tiki tautoko ā-ngākau, ā-pūtea hoki. He whakamārama anō kei roto i te mātārere *Ngā ratonga mā ngā pārurenga* mō te ratonga.

Kei reira anō tō kaitohutohu pārurenga kōti, te pirihihana whakahaere i tō kēhi, tō kaimahi tautoko rānei ki te whakamārama i a koe ki ngā mea kāore koe i te mārama.

Ka taea e koe te whakapā hāngai atu ki tō kaitohutohu pārurenga kōti, mā te Victims Information Line rānei i 0800 650 654.

Te noho hei kaiwhakaatu

I te wā o te whakawātanga, tērā pea ka karangahia koutou me ētahi o tō whānau hei kaiwhakaatu. He āhuatanga ahotea nui pea te noho hei kaiwhakaatu. Ka taea e tō kaiwhiu me tō kaitohutohu pārurenga kōti te whakamārama he aha kei roto me ngā mea hei tūpono māu. Ka taea anō e koe te tiki āwhina mai i tō pirihihana takawaenga.

I MUA I TE KŌTI

Ka kōrero atu te pirihihana takawaenga, te kaitohutohu pārurenga kōti rānei ki a koe mō te wā me te wāhi me tae koe ki te kōti. Ka tukuna anō tētahi pānui whaimana i tō kainga.

Ka kōrero atu te kaiwhiu ki a koe mō te wāhi ki a koe hei kaiwhakaatu. Ka taea anō e koe te tono ki te toro tōmua i te rūma kōti. Kōrero atu ki tō kaitohutohu pārurenga kōti, te pirihihana takawaenga pārurenga, tētahi kaimahi tautoko rānei ki te whakarite i tēnei.

Me kōrero atu ki tō kaitohutohu pārurenga kōti, te pirihihana takawaenga pārurenga rānei mēnā kei te hiahia koe kia whakaritea:

- he tangata ki te tūtaki i a koe ki te kōti, i waho rānei
- he kaitautoko hei noho i tō taha i a koe ina tuku taunakitanga.

I TE KŌTI

Hei kaiwhakaatu, ka pātaihia koe ki ētahi pātai mō ngā mea i pā, mō ō mōhio rānei mō te taihara.

Ina tuku taunakitanga koe, i te nuinga o te wā ka kite koe i te whakapaenga.

I roto i te nuinga o ngā kōti, he wāhi tatari motuhake mō te hunga kaiwhakaatu, engari ko te tikanga ka kite tonu pea koe i te whānau me ngā hoa o te whakapaenga i roto me te wāhi o te kōti.

He mea nui kia whai tautoko koe hei kaiwhakaatu i mua, me taua rā tonu. Me kōrero koe ki tō kaitohutohu pārurenga kōti, kaimahi tautoko rānei mō te tiki tautoko e tika ana mōu.

Te whakataunga me te whiu

I te mutunga o te whakawātanga, ka kitea mēnā i hara, kore hara rānei te whakapaenga. I ētahi ka whakatau te kōti kāore te whakapaenga i te hara nā te wairangitanga te take.

I ētahi kēhi, pēnei i ērā e kore ai e taea e te rōpū whakawā te whakaae tahi ki tētahi whakataunga, ka tū anō tētahi whakawā.

Mēnā ka kitea kei te hara te tangata, ka whakatauhia he rā i muri mai mō tana whiu. Mā tō pirihihana takawaenga, kaitohutohu pārurenga kōti, kaiwhiu rānei e kōrero atu mō te wā o te whakatau whiu.

Ki te whakatauhia kāore te whakapaenga i te hara nā te wairangitanga ka puritia pea hei maimoatanga ki tētahi whare wairangi whita. Ka whakapā atu tētahi kairuruku pārurenga mai i te whare wairangi ki te whakamārama i te tikanga o tēnei ki a koe.

WHAKATAU WHIU

E herea ana te kaiwhakawā i raro i te ture kia whai whakaaro ki ngā āhuatanga maha ina whakatau whakawhiu ia ki te tangata hara, pēnei nā, he aha ngā whakawhiu o mua mō ngā taihara ōrite me ngā pūrongo mō te tangata hara.

Ki te whakaae te kaiwhakawā, ka taea e koe (e tētahi atu rānei i tohua e koe) te pānui tētahi wāhanga, te katoa rānei o tō tauākī pāpurenga i roto i te kōti i te whakawātanga whiu. Pātai atu ki tō kaitohutohu pāpurenga o te kōti, te pirihimana takawaenga pāpurenga rānei ki te tuku i tēnei tono māu ki te kaiwhakawā mōu. E herea ana te kaiwhakawā ki te whai whakaaro ki tō tauākī pānga pāpurenga ina whakawhiu ia i te tangata hara.

NGĀ PĪRA

He motika ā te kaiwhiu me te tangata hara ki te pīra i te whakataunga me te whakatau whiu. Ko te tikanga o tēnei ka riro mā tētahi kōti teitei ake e tirotiro anō te kēhi. Ki te pēnei, ka whakamōhiohia koe e te kaiwhiu mō te hātepe.

I muri i te kōti

Ina whakatauhia kei te hara, ka whakawhiua te tangata hara. Ehara i te mea he māmā te whai maramatanga ki ngā whiu. Mā tō pirihimana takawaenga, tō kaitohutohu pāpurenga kōti rānei e whakamārama atu i te tikanga o te whiu.

TE TUKUNGA I TE WHARE HEREHERE

Ka tukuna ngā tāngata hara mai i te whare herehere mā te tukuhere, i te mutunga rānei o tā rātau whakawhiu. Ka tukuna pea i mua o te wā e tūmanakohia ana e koe, engari ka uru mai anō te wā i noho i rō whare herehere i mua i te whakataunga me te whakatau whiu.

Ki te mutu te whakawhiu a te tangata hara, me mātua tuku ia mai i te whare herehere. Kāore e āhei ki te pupuri tonu i a ia i rō whare herehere ina mutu tana whakawhiu.

Ka taea te tuku te tangata hara i mua i te mutunga o tana whiu mēnā ka whakaaehia he tukuhere. Ka tirohia e te Poari Tukuhere ngā kēhi o te nuinga o ngā tāngata hara me te whakatau mēnā ka pā he mōreareatanga ki te hapori mēnā ka tukuna tōmuatia te tangata hara.

Mēnā ka whakatauhia i hara te tangata hara, ka herea ia ki te tukuhere-kore mō te 10 tau te roa i te iti rawa.

I te nuinga o te wā me ū ngā tāngata hara ki ētahi here whāiti i muri i te tukunga ki te tukuhere. E whakatauhia ana ngā here e te Poari Tukuhere, e te kaiwhakawā rānei nāna te tangata hara i whakawhiu. Ka kapi pea i ēnei whakaritenga te wāhi me noho ia, ko wai te hunga ka āhei te whakapā atu, mēnā he rāhui haere pō, me ētahi atu āhuatanga tiaki i te hapori.

KA TAEA E KOE TE KŌRERO ATU KI TE POARI TUKUHERE MŌ Ō WHAKAARO MŌ TE TUKUNGA O TE TANGATA HARA

Hei whakaputa i ō whakaaro mō te tukunga tōmua o te tangata hara mai i te whare herehere, me rēhita koe ki te rēhita whakamōhio pāpurenga kia pai ai te whakapā atu a te Poari Tukuhere ki a koe ina whakawāhia te tangata hara e te Poari Tukuhere.

Hei mātua whakarite kei te hou ō taipitopito whakapā ki te rēhita, me whakapā atu ki ngā pirihimana, Te Ara Poutama o Aotearoa, tō tari tautoko rānei.

Ka taea e koe te tuku atu i ō whakaaro ki te Poari Tukuhere mā te tuhituhi, te hui ataata, ā-tinana rānei:

- **Ā-tuhi, ā-hui ataata rānei.**

Me kōrero atu ki tō Poari Tukuhere.

- **Ā-tinana.**

Ka hui te Poari Tukuhere me koe. Ka kōrero koe ki ērā tāngata anō ka kite i te tangata hara, engari ko te hui e haere ana koe kāore i te whare herehere, ā, kāore hoki te tangata hara i reira. Ka taea e koe te heri kaitautoko atu ki te whakawātanga.

TE KŌTI KAITIROTIRO MATEWHAWHATI

I tua atu i te kēhi kōti, ka whakahaerehia tētahi whakatewhatewha Kaitirotiro Matewhawhati, ā, tērā pea ka tū he whakawātanga i roto i te Kōti Kaitirotiro Matewhawhati. He kōti motuhake tēnei e tirotiro ana i ngā putake me ngā āhuatanga o te mate o te tangata me ngā mea hei ārai i ngā mate i roto i ngā āhuatanga ōrite.

Ka whakamōhiohia koe e Ngā Ratonga Kaitirotiro Matewhawhati mō te whakawātanga, ā, ka kōrero tō pirihimana takawaenga pāpurenga ki a koe mō tō whakawātanga. Ka taea e koutou ko tō whānau te haere ki te whakawātanga a te Kōti Kaitirotiro Matewhawhati, engari kāore he here i runga i a koe mēnā kāore koe i te hiahia haere.

Ka taea ngā tāngata tautoko te haere i tō taha ki te whakawātanga a te Kōti Kaitirotiro Matewhawhati. Whakapā atu ki 0800 842 846, ki te Victims Information Line rānei 0800 650 654 ki te whakarite i tētahi kaitautoko ki tō taha i te whakawātanga.

Ngā tangata whakapā matua

He tautoko kei reira mō ahakoa kei tēhea wāhanga koe o te pūnaha ture toihara, ā, ka taea e ngā tautoko whaiaro te āwhina i a koe ki te whakarite i ngā pānga o te toihara.

Anei ngā taipitopito whakapā mō ētahi tino ratonga mā ngā pāpurenga me ngā tāngata e pākia e te taihara. Ka kitea e koe he kōrero atu anō mō ngā ratonga mā te waea atu ki te Victims Information Line i 0800 650 654 (9am ki 6pm mai i te Mane ki te Paraire), haere rānei ki victimsinfo.govt.nz

ACC

acc.co.nz

0800 101 996 Claims Helpline

0800 735 566 Sensitive Claims Helpline

(mō ngā pāpurenga koeretanga)

Ngā kaitohutohu pāpurenga kōti

0800 650 654 Victims Information Line

Ara Poutama Aotearoa (Department of Corrections)

04 460 3000

corrections.govt.nz

Te Poari Tukuhere (New Zealand Parole Board)

0800 PAROLE (727 653)

paroleboard.govt.nz

Te tautoko whaiaro

Tirohia a victimsinfo.govt.nz, te wāhanga ratonga āwhina whaiaro rānei i roto i te puka waea.

Ngā Pirihimana

Ka kitea e koe tō teihana pirihimana tūtata i police.govt.nz, i roto rānei i ngā whārangi kikurangi i mua o te puka waea.

Manaaki Tangata

0800 VICTIM (842 846) 24 hāora ia rā

www.victimsupport.org.nz

Women's Refuge

0800 REFUGE (733 843) 24 haora i te rā

womensrefuge.org.nz

Ngā ratonga whakamāori a Language Line

0800 656 656

9am–6pm Mane-Paraire, 9am–2pm Rāhoroi

Rārangi kupu

Utu here

Ina tukuna he tangata kua whakapā hē e ngā pirihimana me te here i runga i a ia me haere ki te kōti.

Kaitirotiro Matewhawhati (Coroner)

Ka whakatauhia e te Kaitirotiro Matewhawhati nōnahea, i hea, i pēhea, me te take i mate ai. Ka whiriwhirihia anō e ia mēnā ka taea te ārai anō i taua momo mate.

Kaitohutohu pāpurenga kōti

He kaimahi nō te Tāhū o te Ture ka whakamārama i te hātepe kōti me te whakamōhio haere i ngā pāpurenga mō te kauneketanga o ā rātau kēhi.

Whakapaenga

Te tangata ka whakatuakina ki te taihara.

Te kōhurutanga

Ina kōhurutia he tangata e tētahi atu tangata.

Tangata hara

Te tangata ka whakaharaina ki te taihara. (I mua i te whakaharaina ki te hara, e mōhiotia ana te tangata e whakapaehia ana mō te hara ko ia te 'whakapaenga'.)

Te tukuhere

Ina tukuna tētahi tangata hara i te whare herehere ki te whakamutu i tana whiunga i roto i te hapori. Me mātua whai i ētahi here whāiti.

Te ture whakahōrite

E taea ana ngā pāpurenga mā te ture whakahōrite te kōrero atu ki tētahi tangata hara mō te pānga o āna mahi, te whakauru whakaaro mō te whakataurite i te hara, me te tīmata ki te whakarite i ētahi o ngā pānga o te taihara. Ka karangahia he hui ture whakahōrite.

Taihara nui

- He taihara koeretanga, tētahi patunga nui.
- He taihara ko te mutunga he wharanga kino, he mate rānei.
- He taihara e noho mātakutaku tonu ana te pāpurenga mōna anō, mō te ora rānei o tōna whānau.

Te rēhita whakamōhio pāpurenga

He rārangi matatapu ka whakamahia e ngā tari ture taihara hei whakamōhio haere i ngā pāpurenga mō te tangata hara, pēnei nā, kei hea ake te kēhi i roto i te hātepe kōti, mēnā ka tukuna rangitahitia mai i te whare herehere, ā, āhea ka wātea mō te tukuhere.

Rēhitahia ō taipitopito ki te pirihihana whakahaere i te kēhi.

Te tauākī pānga pāpurenga

He kōrero mō te pānga o te taihara ki a koe. I te nuinga o te wā ka tuhia te tauākī pānga pāpurenga, engari ka taea te whakauru whakaahua, tātuhinga, whiti rānei. Me mātua whakaaroarohia e te kaiwhakawā ina whakawhiu ia i te tangata hara. Ka taea e te pāpurenga te pānui i te tauākī ki te kōti i mua tonu i te whakawhiu.

